

張籍
孟郊

張司業詩集卷第二

五言下五十九首

春日李舍人宅見西省諸公唱和因書情即事

又見帝城裏東風天氣和官閑人事少年長道情多紫掖發章句青闈更和歌誰知幽寂處終日斷經過

山中春夜

寂寂春山靜幽人歸卧遲橫琴當月下壓酒及花時冷露濕茅屋暗泉通竹籬西峯採芝伴此夕恨無期

送南客

竹路雨脩脩青山盡海頭天涯人去老嶺北水回流夜市連銅柱巢居獨象州來時舊相識誰問日南遊

宿江店

野路臨西浦門前有橘花停燈待賈客賣酒與漁家夜靜江水白路迴山月斜閑尋泊船處潮落見平沙

嶺外逢故人

過嶺萬餘里旅遊經此稀相逢去家遠共說幾時歸海上見花發瘴中聞鳥飛炎州望鄉伴自識北人衣

出塞

秋塞雪初下將軍遠出師分營長記火放馬不收旗月冷邊帳黑沙昏夜探遲征人皆白首誰見滅胡時

寄紫閣隱者

紫閣氣沉沉先生住處深有人時得見無路可相尋夜鹿投茅屋秋猿守栗林唯應採靈藥更不別營心

宿黑竈溪

夜到碧溪裏無人秋月明逢幽便移宿取伴亦探行花下紅泉色雲西乳鶴聲明朝記歸處石上自書名

答僧拄杖

靈藤為拄杖白淨色如銀得自高僧手將扶病客身春遊不騎馬夜會亦呈人持此歸山去深宜戴角巾

送海客歸舊島

海上去應遠蠻家雲島孤竹船來桂府山市賣魚鬚入國自獻寶逢人多贈珠却歸春洞口斬象祭天吳

靈都觀李道士

仙觀雨來靜繞房瓊草春素書天上字花洞古時人泥竈煮靈液掃壇朝玉真幾迴遊閬苑青節自隨身

送韋評事歸華陰

三峯西面住出見世人稀老大誰相識悽惶又獨歸埽窗秋菊落開篋蟄蛾飛若訪雲中伴還應著褐衣

送閩僧

幾夏京城住今朝獨遠歸修行四分律護淨七條衣溪寺黃橙熟沙田紫芋肥九龍潭上路同去客應稀

登感化寺樓

一作登咸陽北寺樓

高秋原上寺下馬一登臨渭水西來直秦山南去深舊宮人不住荒碣路難尋日暮涼風起蕭條多遠心

遊襄陽山寺

秋色江邊路烟霞若有期寺貧無施利僧老足慈悲薜荔侵禪室蝦蟇占浴池閑遊殊未遍即是下山時

登城寄王建

聞君鶴嶺住西望日依依遠客偏相憶登城獨不歸十年為道侶幾處共柴扉今日烟霞外人聞得見稀
送從弟戴玄往蘇州

楊柳閭門路悠悠水岸斜乘舟向山寺著屐到漁家夜月紅柑樹秋風白藕花江天詩景好迴日莫令賒
送朱餘慶歸越

東南歸路遠幾日到鄉中有寺山皆徧無家水不通湖聲蓮葉雨野氣稻苗風州縣知名久爭邀與客同
閑居

東城南陌塵紫幘與朱輪盡說無多事能閑有幾人唯教推甲子不信有庚申誰見衡門裏終朝自在身
寄昭應王丞

借得街西宅開門渭水頭長貧唯要健漸老不禁愁獨凭藤書案空懸竹酒鉤春風石邊寺作意共君遊
酬孫洛陽革

家貧相遠住學館入時稀獨坐看書卷閑行著褐衣早蟬庭筍老新雨徑莎肥各離爭名地無人見是非
送人任濟陰

黃綬在胥下知君非旅行將書報舊里留褐與諸生贈別盡沽酒惜歡多出城春風濟水上候吏聽來聲
晚春過崔駙馬宅東園

閑園多好風不意在街東早早詩聲遠長長酒性同竹香新雨後鶯語落花中莫遣經過少年光漸覺空

送安西將

萬里海西路茫茫邊草秋計程沙塞口望伴驛峯頭雪暗非時宿沙深獨去愁憶鄉人易老莫住近蕃州

題李山人幽居

襄陽南郭外茅屋一書生無事焚香坐有時尋竹行畫苔藤杖細蹋石筍鞋輕應笑風塵客區區逐世名

早春閑遊

年長身多病偏宜作冷官從來閑坐慣漸覺出門難樹影新猶薄池光晚向寒遙聞有花發騎馬暫行看

題清徹上人院

古寺臨壇久松間別起堂看添浴佛水自合讀經香愛養無家客多傳得力方過齋長不出坐倚一繩牀

舟行寄李湖州

客愁無次第川路重辛勤藻密行舟溢灣多轉櫂頻薄遊空感命失計自憐貧賴誦汀洲句時時慰遠人

送安法師

出郭見落日別君臨古津遠程無野寺宿處問何人原色不分路錫聲遙隔塵山陰到家節猶及蕙蘭春

贈海東僧

別家行萬里自說過扶餘學得中州語能為外國書與醫收海藻持咒取龍魚更問同來伴天台幾夏居

寄漢陽故人

知君漢陽住烟樹遠重重歸使雨中發寄書燈下封同年買江鳥今日隔雲松欲問新移處青蘿最北峯

和裴司空即事通簡舊僚

肅肅上台座四方皆仰風當朝奉明政早日立元功獨對赤墀下密宣黃閣中猶聞動高韻思與舊僚同
寄靈一上人初歸雲門寺

寒山白雲裏法侶自招攜竹徑通城下松門隔水西方同沃州去不作武陵迷髣髴遙看處秋風是會稽
使迴留別襄陽李司空

江亭寒日晚絃管有離聲從此一筵別獨為千里行遲遲戀恩德役役限公程回首吟新句霜雲滿楚城
和戶部令狐尚書喜裴司空見招看雪

南園新覆雪上宰曉來看誰共登春榭唯聞有地官色連山遠淨氣與竹偏寒高韻更相應寧同歌吹歡
和裴司空以詩請刑部白侍郎雙鶴

皎皎仙山鶴遠留閑宅中徘徊幽榭月嘹唳小亭風丞相西園好池塘野水通欲將求放此賞望與賓同
同綿州胡郎中清明日對雨西亭宴

郡內新開火高齋雨氣清惜花邀客賞勸酒促歌聲共醉移芳席留歡閉暮城政閑方宴語琴筑任遙情

莊陵挽歌

三首
敬宗

白已昭昭干戈亦漸銷迎師親問道從諫早臨朝倖倖威權薄忠良寵賜饒丘陵今一變無復白雲謠
觀風欲巡洛習戰亦開池始改三年政旋聞七月期陵分內外使官具吉凶儀渭北新園路蕭笳遠更悲
曉月龍車動秋風閭闔開行帷六宮出執紼萬方來慘慘郊原暮遲遲挽唱哀空山烟雨夕新陌繞陵臺

和左司元郎中秋居十首

選得閑坊佳秋來草樹肥風前卷筒簟雨裏脫生衣野客留方去山童收藥歸非因入朝省過此出門稀
有地唯栽竹無池亦養鵝學書求墨蹟釀酒愛乾和古鏡銘文淺神方謎語多居貧閑自樂豪客莫相過
閑來松菊地未省有埃塵直去多將橐朝回不訪人見僧收酒器迎客換紗巾更恐登清要難成自在身
自知清淨好不要問時豪就石安琴枕穿松壓酒槽山情因月甚詩語入秋高身外無餘事唯應筆硯勞
閑堂新埽洒稱是早秋天書客多呈帖琴僧與合絃莎臺乘晚上竹院就涼眠終日無忙事還應似得仙
醉倚斑藤杖閑眠癭木牀案頭行氣訣爐內降真香尚儉經營少居閑意思長秋茶暮夜飲新作松漿
每憶舊山居新教上墨圖晚花迴地種好酒問人沽夜後看朝簿申前發省符為郎凡幾歲已見白髭鬚
菊地纔通屐茶房不壘階憑醫看蜀藥寄信覓吳鞋盡得仙家法多隨道客齋本無榮辱慮不是學安排
林下無拘束閑吟放性靈好時開樂竈高處置琴亭更撰居山記唯尋相鶴經初當授衣假無吏挽門鈴
客散高齋晚東園景象偏晴明猶有蝶涼冷漸無蟬藤拆霜來子蝸行雨後涎新詩纔上卷已是滿城傳
和李僕射雨中寄盧嚴二給事

郊原飛雨至城闕濕雲埋
迸點時穿牖浮漚欲上階
偏滋解籜竹併灑落花槐
晚潤生琴匣新涼滿藥齋
從容朝務退放曠掖曹乖
盡日無來客閑吟感所懷

酬李僕射晚春見示

戟戶洞初晨鶯聲雨後頻
虛庭清氣在衆藥濕光新
魚動芳池面苔侵老竹身
教鋪嘗酒處自問探花人

獨此長多病幽居欲過春今朝聽高韻忽覺離埃塵

和盧常侍寄華山鄭隱者

獨憶三峯下年深學鍊丹一間松葉屋數片石花冠酒待山中飲琴將洞裏彈開門移遠竹翦草出幽蘭
荒壁通泉架晴崖曬藥壇寄知騎省客長向白雲看

和令狐尚書平泉東莊近屬李僕射有寄

平地有清泉伊南古寺邊漲池開繞屋出野徧澆田舊隱離多日新鄰得幾年探幽皆一絕選勝又雙全
門靜山光別園深竹影連斜分採藥徑直過釣魚船雞犬應還識雲霞頓覺鮮追思應不遠賞愛諒難偏
此處堪長往遊人早共傳各當恩重寄歸卧恐無緣

送鄭尚書出鎮南海

遠鎮承新命王程不假催班行爭路送恩賜併時來牙旂從城展兵符到府開蠻聲喧夜市海色潤朝臺
畫角天邊月寒關嶺上梅共知公望重多是隔年迴

徐州試反舌無聲

夏木多好鳥偏知反舌名林幽仍共宿時過即無聲竹外天空曉溪頭雨自晴居人宜寂寞深院益淒清
入霧暗相失當風閑易驚明年上林苑知爾最先鳴

省試行不由徑

田裏有微徑賢人不復行孰知求捷步又恐異端生從易終多欲安難患亦平誰能達天道共此竟前程

子羽有遺訓孔門傳舊聲今逢大君子士節自應明

新成甲仗樓

謝守起新樓西臨城上頭圖功百尺麗藏器五兵修結構
橐橐虛明戶檻周魚龍卷旗幟霜雪積戈矛
暑雨歇蒸隔涼風宴位留地高形遠出山靜氣清幽
睥睨斜光徹欄杆宿靄浮芊芊秔稻色脉脉宛溪流
郡化黃丞相詩情沈隱侯居茲良得意殊勝峴山遊

贈殷山人

鬱鬱山中客知名四十年悽惶身獨隱寂寞性應便
世業公侯族生涯黍稷田藤懸讀書帳竹繫網魚船
已種千頭橘新開數脉泉閑遊攜酒遠幽語向僧偏
入洞題松過看花選石眠避喧長汨沒逢勝即留連
自古多高跡如君少比肩耕耘此辛苦章句已流傳
昔日交遊盛當時省閣賢同袍還共弊連轡每推先
講序居重席羣儒願執鞭滿堂虛左待衆目望喬遷
才異時難用情幽道自全畏人頻慘淡疎物勢迤邐
達者聞知命吾生貴又玄深藏報恩劍久緝養生篇
憔悴衆夫笑經過郡守憐夕陽悲病鶴霜氣動飢鷗
處士誰能薦窮途世所捐伯鸞甘寄食元叔苦無錢
策蹇秋塵裏吟詩黃葉前故囊餘白領廢瑟斷朱絃
志氣終猶在逍遙任自然家貧念婚嫁身老戀雲烟
放逸棲巖鹿清虛飲露蟬鄭逃秦谷口嚴愛越溪邊
霄漢余猶阻榮枯子不牽山城曾一過感激意難宣

七言七十六首

寒食內宴二首

朝光瑞氣滿宮樓，綵繡魚龍四面稠。廊下御厨分冷食，殿前飛騎逐香球。千官盡醉猶教坐，百戲皆呈未放休。共起拜恩侵夜出，金吾不敢問來由。

城闕沉沉向曉寒，恩當冷節賜餘歡。瑞烟深處開三殿，香雨微時引百官。寶樹樓前分繡幕，綵花廊下映朱欄。宮筵戲樂年年別，已得三回對御看。

朝日賜櫻桃

仙果人間都未有，今朝忽見下天門。捧盤小吏初宣勅，當殿羣臣共拜恩。日色遙分廊下坐，露香纔出禁中園。每年從此長先熟，願得千春奉至尊。

拜豐陵順宗陵

歲朝園寢遣公卿，學省班中亦攝行。身逐陵官齊再拜，手持木鐸叩三聲。寒更報點來山殿，曉炬分行照栢城。却下龍門看漸遠，金峯高處日微明。

贈孔尚書

能將直道歷榮班，事著元和實錄間。三表自陳辭北闕，一家相送入南山。買來侍女教人嫁，賜得朝衣在篋閑。宅近青門高靜處，時歸林下斲開關。

賀秘書王丞南郊攝將軍

正初天子親郊禮，詔攝將軍領衛兵。斜帶銀刀入黃道，先隨玉輅到青城。壇邊不在千官位，仗下唯聞再拜聲。共喜與君逢此日，病中無計得隨行。

送令狐尚書東都留守

朝廷重寄在關東共說從前選上公勲業新成大梁鎮恩榮更守洛陽宮行香薙出天橋上巡禮常過禁殿中每領羣官拜章慶半開門仗日瞳瞳

贈閻少保

辭榮戀闕未還鄉修養多年氣力强半俸將燒伏火藥全家解說養生方特承恩詔新開戟每見公卿不下牀竹樹青深寒院靜長懸石磬在虛廊

田司空入朝

西來將相望兼雄不與諸軍觀禮同早變山東知順命新收濟上立殊功朝官序謁趨門外恩使宣迎滿路中闔闔曉開銅漏靜身當受冊大明宮

送鄭尚書赴廣州

聖朝選將持符節內制宣時百辟聽海外蠻夷來蹈舞嶺南封管送圖經白鵬飛繞迎官舫紅槿開當宴客亭此處莫言多瘴癘天邊看取老人星

送和蕃公主

塞上如今無戰塵漢家公主出和親色司猶屬宗卿寺冊号還同虜帳人九姓旗幡先引路一生衣服盡隨身羶城南望無迴日空見沙蓬水柳春

太白老人

日觀東南幽客住竹中藤帶亦逢迎暗修黃錄無人見深種胡麻共犬行洞裏仙家常獨到壺中靈藥自為名春泉四面繞茅屋日日唯聞杵臼聲

寄虔州韓使君

南康太守負才豪五十如今未擁旄
早得一人知姓字常聞三事說功勞
月明渡口章江靜雲散城頭贛石高
郡政已成秋思遠閑吟應不問官曹

和裴司空酬蒲城楊少府

聖朝偏重大司空人詠元和第一功
擁節高臨襄水上題詩還入漢城中
共驚向老多年別更憶登科舊日同
誰不望歸丞相府江邊楊柳又秋風

送從弟濛赴饒州

京城南去鄱陽遠風月悠悠別思勞
三領郡符新寄重再登科第舊名高
去程江上多看堠迎吏船中亦帶刀
到日便行清靜化春田應不見蓬蒿

寄和州劉使君

別離已久猶為郡閑向春風倒酒餅
送客時過沙口店看花多上水心亭
曉來江氣連城白晴後山光滿眼青
到此詩情應更遠醉中高詠有誰聽

胡山人歸王屋因有贈

轉轉無成到白頭人間舉眼盡堪愁
此生已是蹉跎去每事應從鹵莽休
雖作閑官少拘束難逢勝景可

淹留君歸與訪移家處若箇峰前最校幽

送汀州源使君

曾城趙北歸朝計因拜王門最好官為郡暫辭雙鳳闕全家遠過九龍灘山鄉只有輸蕉戶水鎮應多養鴨欄地僻尋常來客少刺桐花發共誰看

寄洛陽孫明府

久持刑憲聲名遠好是中朝正直臣赤縣上來應足事青衫老去未離身長思從省連歸馬乍覺同班少舊人遙愛南橋秋日晚兩邊楊柳蘸天津

送浙西周判官

由來自是烟霞客早已聞名詩酒間天闕因持賀章到江城新著賜衣還常吟卷裏相酬句自畫湖邊舊住山吳越主人偏愛重多應不肯放君閑

送胡鍊師歸王屋

玉陽峰下學長生洞府仙鄉已有名獨戴熊羆冠暫出唯將鶴尾扇同行鍊成雲母休炊爨召得雷公當吏兵却到天壇上頭宿應聞空裏步虛聲

送邵州林使君

詞客南行寵命新瀟湘郡入曲江津山幽自足探微處俗朴應無爭訟人郭外相連排殿閣市中多半用金銀知君不作私家計還日還如到日貧

贈商州王使君

銜命南來會郡堂却思朝裏接班行才雄猶是山城守道薄初為水部郎選勝相留開客館尋幽更引到僧房明朝從此辭君去獨出商關路漸長

寄令狐賓客

勳名盡得國東^{一作家}傳退狎琴僧與酒仙還帶郡符經幾處整離台座已三年留司未到龍樓下拜表長懷玉案前秋日出城伊水好領誰相逐上閑船

寄梅處士

擾擾人間是與非官閑自覺省心機六行班裏身常下九列符中事且稀市客慣曾賒賤藥兒童驚見著新衣君今獨得居山樂應笑多時未辦歸

送施肩吾東歸

知君本是烟霞客被薦因來城闕間世業偏臨七里瀨仙遊多在四明山早聞詩句傳人徧新得科名到處閑惆悵灞亭相送去雲中琪樹不同攀

崑崙兒

崑崙家在海中洲蠻客將來漢地遊言語閑教秦吉了波濤初辨鬱林州金環欲落曾穿耳螺髻長拳不裹頭自愛肌膚黑如漆行時半脫木綿裘

贈李杭州

仙郎白首未歸朝，應為蒼生領六條。惠化州人盡清靜，高情野鶴與逍遙。竹間虛館無朝訟，山畔青田長夏苗。終日政聲長獨坐，開門唯望浙江潮。

酬杭州白使君兼寄浙東元大夫

相印慙辭臨遠鎮，掖垣出守復同時。一行已作三年別，兩處空傳七字詩。越地江山應共見，秦天風月不相知。人間聚散真難料，莫歎平生信所之。

寄蘇州白使君

三朝出入紫微臣，頭白金章未在身。登第早年同座主，題書今日是州民。閭門柳色烟中遠，茂苑鶯聲雨後新。此處吟詩向山寺，知君忘却曲江春。

酬浙東元尚書見寄綾素

越地繒紗紋樣新，遠封來寄學曹人。便令裁製為時服，頓覺光榮上病身。應念此官同棄置，獨能相賀更殷勤。三千里外無由見，海上東風又一春。

送白賓客分司東都

赫赫聲名三十春，高情今獨出埃塵。病辭省闥歸閑處，恩許官曹作上賓。詩裏難逢相得伴，酒邊多見自由身。老夫也擬休官去，便是君家池上人。

贈王司馬赴陝州

京城在處閑人少，唯共君行並馬蹄。更和詩篇名最出，對傾盃酒戶常齊。同趨闕下聽銅漏，獨向軍前

聞鼓聲今日春明門外別更無因得到街西

同將作韋少監贈水部李郎中

舊年同是北曹郎各罷魚符自楚鄉重著青衫承詔命齊趨紫殿異班行別來共說經過事老去相傳補養方憶得當時亦連步如今獨在講書堂

寄王六侍御

漸覺近來筋力少難堪今日在風塵誰能借問功名事祇自扶持老病身貴得樂資將助道肯嫌家計不如人洞庭已置新居宅歸去期君與作隣

送稽亭山僧

師住稽亭高處寺斜廊曲閣倚雲開山門十里松間入泉澗三重洞裏來名岳尋遊今已徧家城禮謁便應迴舊房到日閑吟後林下還登說法臺

贈項斯

端坐吟詩忘忍饑萬人中覓似君稀門連野水風長到驢放秋原夜不歸日暖剩收新落葉天寒更著舊生衣曲江亭上頻頻見為愛鷗鷺雨裏飛

寄陸渾趙明府

與君學省同官處常相隨說道情新得陸渾山縣長早知三禮甲科名郭中時有仙人住城上應多樂草生公事稀疎來客少無妨著屐獨閑行

贈道士

城裏無人得實年
衣襟常帶臭黃烟
樓中賒酒唯留樂
洞裏爭棋不賭錢
聞客語聲知貴賤
對花歌詠似狂顛
尋常行處皆逢見
世上多疑是謫仙

送裴相公鎮太原

盛德雄名遠近知
功高先乞守藩維
銜恩暫遣分龍節
署勅還同在鳳池
天子親臨樓上送
朝官齊出道邊辭
明年塞北諸蕃落
應起生祠請立碑

送李司空鎮襄陽

中外兼權社稷臣
千官齊出拜行塵
再調公鼎勳庸盛
三受兵符寵命新
商路雪明旗旆遠
楚堤梅發驛亭春
襄陽風景由來好
重與江山作主人

送李僕射赴鎮鳳翔

由來勲業屬英雄
兄弟連營列位同
先入賊巢擒惡首
盡封官庫讓元功
旌幢獨繼家聲外
竹帛新添國史中
天子欲收秦隴地
故教移鎮右扶風

寄白二十二舍人

早知內詔過前輩
蹭蹬江南百事疎
湓浦城中為上佐
廬峯寺後著幽居
偏依仙法常求藥
長共僧遊不讀書
三省此來名望重
肯容君去樂樵漁

寄元員外